

ist erklärt worden. Derwegen leügnen wir keinswegs, sonder glauben vnd bekennen mit Hertzen vnnd Mund, das wir nach der aufferstehung deß Fleischs jrgendt sein werden, es seye ja, wa es wölle. Was es aber sein werd, das wissen wir nicht, vnd sollen auch in diß Geistlich Himmelisch Wesen vnserer jrrdische fleischliche Gedancken nicht bringen. Dann wir weder reden noch gedencken könden, was es sein werde einmal nichts jrrdisch, sonder alles Himmelisch vnd vnaußsprechlich.

Diß sey gnüg auff dißmal auß vnserm einfeltigen Christlichen Kinderglauben zur bestetigung vnser Lehr von der Maiestet deß allenthalben nach der Menschheit regierenden Christi vnnd zů widerlegung der vngegründten vnd beschwerlichen Aufflag, als solt Doctor Luther seeliger oder wir durch die Lehr von der Maiestet deß Menschen Christi die Articul vnser Christlichen Glaubens vermischet vnd verfelschet vnnd beides von dem Himmel vnd der Höll nichts halten. Dise einfeltige Bekanntnus von dem Herren Christo in allgemeinem Christlichen Kinderglauben begriffen hat der heilig lehrer Athanasius auch in seim Symbolo beschriben, wölchs, dieweil es kurtz vnnd ein gantz herrliche bekanntnus ist vnser Christlichens Glaubens, wölten wir es hieher gantz setzen, vnd lauttet zů teutsch also:

[71:] Symbolum Athanasij.

„Wer da will selig werden, der muß vor allen dingen den rechten Christlichen Glauben haben. Wer denselben nicht gantz rein helt, der würdt ohn zweiffel ewiglich verlorn sein. Diß ist aber der recht Christlich Glaub, daß wir ein einigen Gott in drey Personen vnnd drey Personen in einiger Gottheit ehren vnd nicht die Personen ineinander mengen noch das Göttlich Wesen zertrennen. Ein andere Person ist der Vatter, ein andere der Son, ein andere der heilig Geist. Aber der Vatter vnd Son vnd heilig Geist ist ein einiger Gott, gleich in der Herrligkeit, gleich in ewiger Maiestet. Wölcherley der Vatter ist, solcherley ist der Son, solcherley ist auch der heilig Geist. Der Vatter ist nicht geschaffen, der Son ist nicht geschaffen, der heilig Geist ist nicht geschaffen. Der Vatter ist vnmeßlich, der Son ist vnmeßlich, der heilig Geist ist vnmeßlich. Der Vatter ist Ewig, der Son ist Ewig, der heilig Geist ist Ewig, vnnd seind doch nicht drey Ewige, sonder es ist ein Ewiger, gleichwie auch nicht drey vngeschaffne, noch drey vnmeßliche, sonder es ist ein vngeschaffner vnnd ein vnmeßlicher. Also auch der Vatter ist Allmechtig, der Son ist Allmechtig, der heilig Geist ist Allmechtig, vnd seind doch nicht drey Allmechtigen, sonder es ist ein Allmechtiger. Also der Vatter ist Gott, der Son ist Gott, der heilig Geist ist Gott, vnnd seind doch nicht drey Götter, sonder es ist ein Gott. Also der Vatter ist der Herr, der Son ist der Herr, der heilig Geist ist der Herr, vnd seind doch nicht drey Herren, sonder es ist ein Herr. Dann gleichwie wir müssen nach Christlicher warheit ein jegkliche Person für sich Gott vnd Herrn bekennen, also können wir im